




www.BibleForChildren.org


Cenisihs 1




Maawac tahsh kihci
niikaan, Kishemanitoo
okii oshihton kiishik,
ahkiini kaye.



Kiihpikwacaya'iiwan, kiimashashkwaa hsa kaye o'o
ahki. Nipi tahsh kiihkiishkaayawaa,
wiinke tahsh misiwe
kiihkashkiitipihkan.
Kishemanitoo tahsh
otAhcaahkwan
ahshicipiik kiihpimi
ayaawan.



Kishemanitoo tahsh kii-ihkito, “Taka tawaahseyaa.”
Miihsh kaaishi waahseyaanik. Kaakii waahseyaanik
tahsh kiishikan okii ishinihkaataan shikwa kaakii
kashkiitipihkaninik tahsh tipihkan okii ishinihkaataan.




Miihsh kaa-anishi tipihkaninik, kiiani kishepaawakanini
kaye, mii 'i kiihpeshikokiishikaninik.



Kishemanitoo tahsh kii-ihkito, “Taka, ta-ayaamakan aahsamikiishik akwana'ikanink keinentaakwahk keshi piihtawaakin nipiin.” Kiishik tahsh okii ishinihkaataan i'i aahsamikiishik. Miihsh kaa-anishi tipihkaninik ekii ani kishepaawakaninik kaye, mii 'i kiiniishokiishikaninik.



Kishemanitoo tahsh miinawaa kii-ihkito, “Taka
tamaamawiciwanoon ini aahsamikiishik eyaakin nipiin
i'ima peshik ayaawinink, cinaakwahk
cipaankwahkamikaak.” Mii hsa 'i kaaishihsenik. Kaakiih
paankwahkamikaanik tahsh ahki okii ishinihkaataan,



kaakii ishi maamawiciwaninikin tahsh nipiin kihcikam
okii ishinihkaataan. Wiinke tahsh okii minwaapantaan.




Kishemanitoo tahsh miinawaa kii-ihkito, "Taka o'omaa
ahkiink tasaakahkiiwan kaatahswewaanakahkin

kihtikaani kekoonan, taapishkoo
ashkipakoon kaamiiniwankin
kihtikaanenhsan, iki kaye
miinaahtikook entinowiwaatc
kaanihtaawikihtoowaatc

miinan
i'ima kaapiintekin
wahkantaaminan."



Mii hsa 'i kaaishihsenik. Miinawaa tahsh kiiani tipihkan,
kiiani kishepaawakan kaye, mii 'i kiinihsokiishikaninik.



Miitahsh Kishemanitoo kaaishi oshihtootc niishin kehci
waahsahkonenikin; kiisihsoon ketipentaminitc
kiishikan shikwa tipihkikiisihsoon
ketipentaminitc tipihkan.
Wanankohsha' tahsh kaye
okii oshi'aa'.




Kiiani tipihkan tahsh, miinawaa ekii ani
kishepaawakahk,
mii 'i kiiniiwikiishikaninik.



Miinawaa tahsh
Kishemanitoo kii-ihkito,
“Taka tapahtiinowak nipiink
kaa-ayaawaatc
kemooshkinewaatc i'ima
nipiink. Tatashi
papaamihsewak kaye
pinehshiinshak
newacikiishik.” Miinawaa
kiiani tipihkan, kiiani
kishepaawakan kaye. Mii
hsa 'i kiinaanokiishikaninik.




Miinawaa tahsh Kishemanitoo kii-ihkito, “Taka ta-ayaawak aya'aawihshak wakitahkamik, anooc citahswewaanakisiwaatc. Awahkaanak ta-ayaawak, iki kaye kaapimootewaatc, pikwaci aya'aawihshak kaye.” Mii hsa 'i kaaishihsenik.




Kishemanitoo tahsh kii-ihkito, "Taka oshi'aataanik
awiyak pemaatisiwaatc kaaishinaakosiyank
ishi'aataanik, eshi'ayaayank kaye ci-ishi'ayaawaatc. Oka
tipenimaawaa' tahsh kinooshe' i'ima kihcikamiink
eyaanitc, pinehshiinsha' kaye
newacikiishikonk eyaanitc,
awahkaana' kaye,
kaapapaamootenitc kaye.
Misiwe kaye ahkiini
oka tipentaanaawaa."



Kishemanitoo tahsh okii waapantaan kahkina kekoon
kaakii oshihtootc, aahpici tahsh wiinke kiionishihshinini.
Miinawaa tahsh kiiani tipihkan, ekii ani kishepaawakahk
kaye. Mii 'i kiininkotwaahsokiishikaninik.



KaaTipenciketc Kishemanitoo tahsh okii ishiwinaan
ininiwan mino ahkiink litin kaakii ishinihkaatenik
kihtikewahkamikonk ekiih pakitinaatc cikihtikaataminitc,
cikanawentaminitc kaye.



KaaTipenciketc
Kishemanitoo tahsh
okii'inaan ini ininiwan,
“Pisaan iko kika onci
wiihsin kahkina oko
mihtikook eyaawaatc
o'omaa kihtikewahkamikonk.
A'ahsh wiin peshik mihtik
kaaonci kihkentaakwahk
mino'ishiwepisiwin, i'i kaye
maci'ishiwepisiwin, kaawiin i'ima
kika ontancikehsii. Ahpii hsa
i'ima ontancikeyan,
tepwe kika nip,” okii'inaan.



Miitahsh kaaishi wiinaatc a'a inini kahkina awahkaana',
minihk kaye pinehshiinsha' kaapimihsenitc
newacikiishik, aya'aawihsha' kaye. Kaawiin tahsh
mahshi kiimihkawimaahsiiwan
kwayahk kewiici'ikotc a'a inini.



Miitahsh kaaTipenciketc Kishemanitoo okiih
kihpaikwahshimaan ini ininiwan, miihsh kaaishi
nipaanitc. Okii otaahpinamawaan tahsh peshik
ohpikekanini. Meshkwac tahsh
wiiyaahs okiih kipa'ikaaken
kaakii onci otaahpinaatc
ohpikekanan. l'imaah tahsh
ohpikekaniniink okii onci
oshi'aan ini ihkwewan.
Miitahsh kaakii ishi
piitamawaatc
ini ininiwan.



Miitahsh inini keonci nakanaatc oteten,
omaamaan kaye, ewii minciminaatc ini wiiwan.
Peshikwan keishi wiiyaahsewaatc.



Aaniihsh Kishemanitoo
ehpiihsishawenimaatc pemaatisinitc
ahkiink, kii'miikiwe ehpesihikonitc
oKosihsan, awenenan itahsh iko
ketepweyenimaatc, . . .



. . . ekaa cinihshiwanaatisihsik,
ciayaatc itahsh i'iweni pimaatisiwin
wiihkaa keishkwaahsehsininik.



Oroomanak 3:23 Kahkina awiya kii'macitootam. Kaawiin
awiya okiihtepishkansiin Kishemanitoo
okihci-inentaakosiwininiink ci-ishinaakositc.

Oroomanak 6:23 Nashke macitootamowin awiya ehtootank
nipowinini taontisi. I'iweni tahsh wiin Kishemanitoo
kaamihcimiikiwetc pimaatisiwin, kaawiin wiihkaa
tawehkwaahsehshini. Mii 'iwe kitooncimiinikoomin Christ
Ciisahs kaaTipeniminank e'wiiciwinank.

Hiiparoowak 9:27 Oncitako ishinaakwanini awiya aapitink
cinipotc. Kii'ishkwaanipotc itahsh mii 'i citipaahkonikotc
Kishemanitoo.

Ihpiishiyanak 2:8,9 Okishewaatisiwinink ohsha
kikii'oncipimaaci'ikoom, aanihsh kikiihtepweyentaam.
Kaawiin wiin kiinawaa i'i kikashkihtamaasohsiim,
Kishemanitoo ohsha i'i omiikiwewin.



Kaawiin wiin kaye anohkiiwinink oncihsinoon
pimaaci'ikoowin, awiya hsa inini ekaa
cioncikihcikaakiikitohsik.

Oroomanak 10:9,10 Kiishpin mohshewiinatc Ciisahs
ehtipenciketc, wiinke kaye tepwehtaman kaye
Kishemanitoo ekiihkiiwepimaatisi'aatc Christan i'ima
nipowinink, mii hsa 'i cipimaaci'ikooyan.

Aaniihsh wiinke tepwehtamank mii'ima
wencikwayahkwaaci'inank ciminowiiciwinank
Kishemanitoo; e'mohshewiintamaakeyank tahsh kaye
kitooncipimaaci'ikoomin.



Cwaan 3:16,17 Aaniihsh Kishemanitoo
ehpiihcishawenimaatc pemaatisinitc ahkiink, kii'miikiwe
ehpeshikonitc oKosihsan, awenenan itahsh iko
ketepweyenimaatc, ekaa cinihshiwanaatisihsik, ciayaatc
itahsh i'iweni pimaatisiwin wiihkaa keishkwaahsehsininik.

Kishemanitoo okiihpi-ishinisha'waan oKosihsan omaa
ahkiink, kaawiin wiin cipitipaahkonaanitc i'i ahkiink
kaa-ayaanitc, wiin cioncipimaatisinitc i'i ahkiink
kaa-ayaanitc.

1 Cwaan 5:11-13 Miitahsh o'o tipaacimowin ehshihsink,
Kishemanitoo ekii'miininank pimaatisiwin wiihkaa
kepoonihsehsininik. I'i hsa pimaatisiwin oKosihsink onciini.



A'a tahsh kaa-ayaawaatc oKosihsimaan otayaan
pimaatisiwin. A'a tahsh wiin kaa-ayaawaahsik
Kishemanitoon oKosihsini kaawiin otaayaahsiin
pimaatisiwin.

Kitooshipii'amawininim itahsh ono kiinawaa
kaatepwehtamowek owiinsowinini Kishemanitoo
oKosihsan, ciki hkentamek e'ayaayek pimaatisiwin wiihkaa
kepooni hsehsinok.



Cenisihs 1-2

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: Bob Davies; Tammy S.

Ojibwe Shorter Bible (Roman Script) (ojb) © 2008 Canadian
Bible Society

<https://live.bible.is/bible/CJBCB2/MAT/1>

©2026 Bible for Children, Inc.

www.M1914.org

www.bibleforchildren.org

